

In viadi sur tiara, aua ed aria

ZUG Il Chor Rumantsch Zug ei staus dus dis sin viadi e quei sur tiara, aua e -
– silmeins culs patratgs- per part en l' aria.

Igl ei stau in bi viadi cun bia variaziun e bien humor. La damaun marvegl serimnan ils cantadurs per ir cun igl autocar ilg emprem tochen a Kirchberg nua ch'ei dat en il *Restaurant Toggenburgerhof*, in bien café. Gia resunan las empremas canzuns. Silsunter va ei cun la nav da Romanshorn a Friederichshafen quei che lai nescher tier enqualin sentiments maritims. Duront gentar en l'ustria «*Wirtshaus am See*“ audan ins a discuorer ils cantadurs en divers idioms sur divers themas.

E sche ins ei a Friederichshafen sauda ina viseta el „Zeppelin-Museum“ el program il qual ei gest sper il lag. Sin in spazi dad exposiziun da 4000 m2 san ins admirar la pli gronda collecziun digl entir mund sur da la historia e da la tecnica dils Zeppelins. Enqualin dils cantadurs san buca zuppar il glischar dils eglis vid il patratg da sgular ein in da quels bastiments dell'aria en grondas altezias.

Impressiunai da las aventuras e prestaziuns dil signur Ferdinand Graf da Zeppelin van ils cantadurs vinavon encunter la vischnaunca da Roggenbeuren nua che la'ustiera dil „*Landgasthof Krone*“ beneventa nus. Strusch mess giu las valischas en las bialas combras serimnan ils cantadurs tier igl aperitiv en il foyer dil hotel per schar resunar lur bialas canzuns romontschas. Quei dat fom – in bellezza buffet cun tut las tratgas che ins sa metter avon spetga fa lu dustar quella. Sunter quella tscheina opulenta anflan ils cantadurs mo plaunet enzacu tard la notg lur letgs.

Rinforzai dad in gustus ensolver va ei il secund di vinavon encunter il „Hopfengut 20“ a Tettngang. Gia all'entschatta astgan ils cantadurs schigiar la buna gervosa che vegn fatga en quei bein puril. Silsunter declara il pur sez als cantadurs sur da siu mistregn. Igl ei fetg interessant dad udir detagliadamein sco la virtit (Hopfen) crescha e reiva egl ault. Tettngang ei il quart grond territori da virtit dil mund ! 80 % da la raccolta a Tettngang va egl export. «Tgi havess cartiu da quei?» para beinenqual cantadur da tertgar. Savend lu aschi bia sur da la raccolta da la virtit san ils cantadurs strusch spetgar da beiber ina buna gervosa frestga tier in bien gentar en l'ustria dil bein puril.

Silsunter eis ei uras da returnar encunter la Svizra. Ed aschia arriva la societad a lur davosa finamira da quei bi viadi en il bi marcauet da Werdenberg. Quei bi marcau vegl en la val dil Rhein da sogn Gagl presenta denter auter uonn puspei lur aschi numnada „Werdenberger Schloss-Feststpielen“. Naven dils 2 entochen ils 18 d'uost presentan els la capo d'ovra da Giuseppe Verdi, la Traviata (<https://latraviata18.ch/>). E cheu anflan ins denter ils solists en la rola dil Giuseppe il president dil Chor Rumantsch Zug Corsin Derungs.

Duront il retuorn encunter Baar astga il guid ed organisatur da quei bellezza viadi retscheiver bia laud e grond engraziament dils cantadurs.

Per il Chor Rumantsch Zug
SACHA MÜHLEBACH